

曾忠襄公書札

曾忠襄公書札

卷之十五目錄

復吳摯甫

復金和甫將軍

致葆芝岑

致葆芝岑

復江馨舫

復江馨舫

復江馨舫

復江馨舫

復劉毅帥

復王竹侯

復郭子美

復金和甫

復丁雨生中丞

復馮展卿中丞

致謝家福

復張朗帥

復李仲雲

復江蓉舫

復丁愼五

致許子純

復劉瑞雲

復劉南雲

致潘琴軒中丞

致丁愼五

復江蓉舫

復閻丹初

復張松平

致李蘭蓀

復郭筠仙

復李次青

復閻丹初

復鮑春霆

復瑞睦菴

復閻丹初

復閻丹初

致閻丹初

復閻丹初

復江馨舫

復廣夢堂

復隋車修

復劉瑞雲

復劉瑞雲

復奎瀚泉

復江蓉舫

復楊石泉

復盛旭人

致李玉帥

致彭雪琴

致楊石泉

復江蓉舫

曾忠襄公書札卷十五

復吳摯甫

金陵勾當既畢遂伏處湘皋以耕代祿文正賓幕中賢如閣下者雖卑欽姓名亦末由握敘一申願言之素景企清揚慙如饑渴昨因王步先窮途無告恃愛謬以一函通於左右求堦前之尺地生寒士之歡顏餘情款款多未宣展頃奉郵告如親唾咳憶盛集於江南絮譚往事抱孤琴於海上謬許知音把玩詠航彌增傾倒若夫處脂不潤入世不諧吾輩自命爲獨行之事所遭往往如此如我公者早已盡其在我絕不必求知於人惟以待造物之安排而已然循能之聲見重令僕表率之政嗣武趙



張已非一日矣行見總轡天衢馳驅皇路發所蘊蓄爲吾道光寵慎勿以一試不當遂欲善刀而藏叨在世好輒貢區區步先尊甫早歲曾改時藝終不忍其潦倒因所學平平屢援屢躓步先所學不如箕裘詩文塞處多而亨處少茲幸緇衣之好硯食有所興紉盛誼入晉以來枯坐無友鼎丞出外日多未能長譚惟和甫直刺在晉年久情形既熟官聲亦好年來共事常得贊助之力不獨喜植之先生後起有人亦以見桐城鄉耄宗風流衍不墜因辱厚問並以奉慰弟早事戎旃莫親簡冊文正徂逝以後猶不願以碌碌塵勞奪我田間叱犢之樂旋以朝命起用未敢盤桓一秉河符遂移晉節迺受事之始卽遭枯旱頻

歲至今哀鴻彌野甚至骨肉吞噬而不能延旦夕之命凡史冊  
所無者弟不幸皆親見而親聞之所夕焦思直窮於術幸賴  
兩宮仁聖恩賚便蕃薄海臣民輸將相望而二三交好亦均竭  
其心思才智企以人力補天之窮始獲免於顛踣驚定以思猶  
有餘痛茲承溢美之詞遂謂名可獨居功無其讓竟以碌碌季  
弟方之吾家賢兄殆耳食鼎丞諸君阿好之詞要非海內之篤  
論也愧荷愧荷鼎丞昨已由都旋晉此後如有機遇便有可望  
古稱雄長一世若斯其難鼎丞除官殆亦類是然渠於晉賑宣  
力獨多厚以酬之尚不盡爲私誼也

復金和甫將軍

頃奉九月望前賜函祇聆種切承示貴部懸軍邊域餉項艱難  
撐持至爲棘手囑將河東協款設法援濟等因伏念貴軍轉戰  
窮荒收功旦夕全賴士飽馬騰之助不但弟曾事軍旅深知此  
中甘苦分應竭盡棉薄卽西事爲大局所繫凡辱有籌餉之責  
者亦何敢稍形膜視令麾下獨任其難頻年遭逢奇旱西餉悉  
停每與同官談及深以未能協湊爲歉滿擬今歲麥收豐稔引  
路暢銷便將道庫應撥賑運銀兩先行挪解尊處藉彌以前缺  
憾乃上忙因二麥不登紛紛蠲緩賑運要需仍不得不遵照奏  
案於道庫提先運費究亦涓滴無多此上忙後未能籌解尊餉  
之實情也五月得雨後秋禾普種冀以下年豐收藉補上年不

足又因伏雨欠缺至今下忙多難開徵是以河東引鹽無人承運所有涓滴入款尙不足供京餉之半協餉更無論矣至於荒後撫綏要款如籌備籽種耕牛農具需用猶屬浩繁仍不得不將道庫司庫應撥賑運之款羅掘應急卽如買牛一款與歸還所借匯號之項以爲運糧之費皆萬分迫切而不可稍緩須叟者此救民之急如救焚溺實於天災流行而非敢有心負我良友也現在賑務雖停善後方亟又值三省遭禮以後鹽務疲累非常雖有接濟前敵將士之心仍無的實款項可以勉強撥解此又秋後未能籌解奉撥尊餉之實在情形也迭次疏陳天聽敕部別作籌度未蒙大部議允一俟年光稍轉引路稍暢何

會見事及書札卷十五  
忍上負麾下萬里寄書之意諸求涵鑒爲幸至尊處提餉委員  
雖久住河東或未盡悉晉局之底蘊用特詳陳原委以達左右  
如來年春間情形稍爲活動卽當飛飭河東道先行籌解尊餉  
以慰殷望臨穎曷勝惶歉之至

致葆芝岑方伯

昨日談及買補還倉穀價日內卽可派員委解具紉慎重儲蓄  
之意曷勝欽佩細閱尊開清摺其時估在一兩以內者二十處  
所有閣下批發之數自係酌核爲之但現在時迫歲暮此後穀  
價有增無減似亦無可撙節且入冬無雪如能在東南郡縣稍  
事蓄積或可有備無患蓋來年春麥如果豐收在晉省穀價每

倉石時估一兩以內亦屬無可再減如失此機會萬一開春荒  
歉穀價踊騰糜費更多貽誤更大倘因州縣意存漁利未便予  
以巨款何妨責成該管府州認真督率加結存案一有不實按  
侵盜倉庫律嚴參追繳以治其罪似不可因噎廢食想閣下老  
成練達於仕途情僞閱歷深透當必以斯言爲然鄙意擬請閣  
下將此二十處悉照該州縣原請數目一併將銀悉數全行給  
發毋須枝枝節節零星碎發庶不至耽延時日倘以解款過巨  
委員一人難以照料或每起派一委員俾昭慎重亦無不可諸  
希查照辦理將一兩以內者全行發銀早買爲要至一兩三錢  
與一兩三錢以外地方尊籌至爲周密卽不必更議添發可也

致葆芝岑方伯

近以雜病糾纏祈雪之舉未能隨同將事至爲愧疚所企積誠感格立沛祥霽舒吾儕望歲之懷慰大地來蘇之願且禱且盼前以省南被災過重予遣之黎僅餘一息不但新舊拋荒地畝錢糧亟應查明請免卽現在耕作之民籽種工力皆較平時加數倍之貴如終歲勤動除完糧當差而外所得升斗不足供其俯仰殊非凋殘之後應培元氣至計當擬將永平虞芮汾吉等處六七兩年錢糧暫停一忙祇收一忙俾以餘力墾作荒地或者地方猶有元復之日弗至日侵月削益無聊賴更爲流亡之續比經函商丹初星使亟以此論爲然勸令趕於臘中敘奏惟

此等無例無案之事全在力陳艱難爲民請命方不至虞農部  
排斥是固係尊詳之善於說詞猶切望閣下之酌奪可否也至  
弟所指六處之外丹翁又擬添沁水垣曲二處頃弟又思陽城  
被災極重石樓地方過苦似應一律辦理庶不至涉偏枯如此  
外尙有應行增入之處卽請台端查明照辦再丹老之意以爲  
旣免一忙則甯免下忙徵收上忙以上忙爲日舒長且有秋收  
之望下忙爲日迫促難以全力注赴所論深得閭閻甘苦諸以  
詳告如尊意亦以爲然卽請飭局將應免州縣若干處應免一  
忙若干銀開單示悉便於定議後照詳具奏或亦善後培護之  
一道也此外請豁老荒與逃絕不能歸併於地丁糧一案封篆



前擬卽出奏併希轉飭局員留意爲幸

### 復江蓉舫

頃奉月之十二日手函誦聆壹是虞平等縣請免六七兩年上忙一忙嗣又益以垣曲沁水陽城石樓共十一州縣業於十三日專摺具奏俟奉 恩旨再行宣布續買牛馬之議弟以省南耕牛過缺此次採辦之數並計雖多分布實屬無幾且因瘟耗損更形不足故擬於存項二萬之外由局再行籌撥銀數萬兩於開春續買牛馬藉助東作惟昨接丹初先生來函以喂養費事不如以此項買牛馬之錢作爲勸墾之費大約認墾一畝者給牛力銀三錢認種至五十畝者卽應給銀十五兩便可自買

牛隻存牛力之名而無喂養之累若能籌銀五六萬兩計可開荒至數千頃弟以此便利許卽照辦然應如何招徠給散方可得有實際望閣下就近稟請丹老示遵卽諭令玉山刺史由蒲解等屬先行辦起俾荒蕪地畝悉返耕鑿之利是爲至要差徭一事近日商同芝岑方伯非派委大員澈底查辦不可蓋以無名之科派尤甚於有定之正供若不亟時查明革禁是雖屢乞蠲緩之恩仍苦攤派之累斷非荒後民力所堪現將省南州縣分作三路汾州太原一路委陳守丙昌平陽霍隰一路委劉守鼎新平沁潞澤一路委趙守效曾大約極衝州縣卽仿永濟章程次衝州縣卽仿夏縣章程偏僻州縣卽仿虞鄉章程尙能

悉就繩尺令荒後農民藉蘇喘息亦善後事宜之一要也鹽務覆奏於二十日拜發摺尾已照來函更正當卽鈔行冰案至應需筆資既商定奉有明文再行清付當不至虞虛擲來春京餉與金營協餉以現存庫項計之撥解弗至貽誤良深欣慰省外於初間均已得雪惟大小不甚均勻京師於初十日亦得雪四寸餘或天心漸轉民氣可稍舒乎

復江蓉舫

頃接嘉平二十八日惠函誦悉種切鹽務覆奏已交部議幸聞豫綱漸有起色陳引尙可催行其京協各餉以現在存項計之屆時均可無誤具紉精思密運全局羅胸欣忭無似虞平永吉

十一州縣預免六七兩年一忙錢糧之奏已奉 特旨俞允惟  
丁糧老荒擬請永遠蠲免無主無力新荒擬請分別緩徵因歲  
內詳稟不齊未能具奏現擬開篆時先行拜發便定本年上忙  
界限不卜趕辦得及否差徭一事至爲農民之累今欲澈底查  
辦總不出按正糧以均苦樂嚴過割以杜影射定限制以防中  
飽三語至於限制之中凡素食差徭之利者斷不能盡奪其養  
而後可以持久否則吾輩一去必將月立巧取名目是眼前雖  
有均減之名後日轉滋掊克之累閣下所謂變本加厲者實係  
洞見垣一方人之論當詳告該委員等斟酌下手俾窮民永沾  
其惠弗令已定之數變爲公款無厭之欲流弊方來庶幾無遺

憾耳牛力銀兩馬牧頃已具稟批令照辦但給領者必須無主無力之佃農方於開荒有益希閣下督飭馬牧且就解屬行之不必驚博大之名反致毫無實效弟意解屬辦好凡災重州縣如臨汾靈石及所免六七兩年一忙正賦之處皆可仿此辦理緣以現在力量爲通省計雖不足爲此十數州縣計尙不難也平陸車馬經蘇紳捐資辦理足紓目前之困惟若人觀察近擬移局赴直弗知尙能顧及垣曲否新正四日省中又得雪三寸許似此光景麥收尙有可望耳

復江蓉舫

頃奉二十一日手函誦聆種切蠲免丁糧老荒之案已於開篆

後具奏其新荒各案因查覆不齊稍作停頓大約下月亦須辦出無可再延隰州臨汾老荒累糧卽照傳牧蔣令所查數目先行出奏縱有不合好在失之於寬非失之於刻尙易設法辦理倘幸邀 俞允此後官斯土者弗至苦於吏議民亦免於流亡堪紓厯系惟隰州上年民欠曾否詳求豁免不甚省記或由閣下函詢水牧如其未辦不妨一律掃除無留滋蔓之慮差徭一事星使脫意辦理昨日又將改定差章三十六條寄省弟逐細體察其待民也固寬其待官也亦甚恕似仿照辦理尙無扞格已飭陳守等各鈔一分攜以出省其有不合者令將實在情形稟明星使更爲折衷至蒲解絳三屬差徭前行札件係據星使

來函所辦雖曰諸事卽由台端就近核定然總須稟商星使方爲妥叶今閣下旣領會此意且派令張丞往來商榷甚善甚善河南鹽事似揀一明幹之員馳往辦理亦無不可太平差章業經朱令稟謁星使定議昨日來函亦曾題及並囑將朱令久於其任以便措施自應照辦鼠患稍熄狼害依然星使謂當重賞所論自當希將尊示多發河東所屬徧爲張貼務除此害一面由尊處稟請立案以便州縣領款報銷方爲結實不必令其捐廉反致空言徒託也靈石榆次差錢久爲官之私利今欲令以此款辦公在官無能藉口而出項依舊此後竊慮無以自立似亦不能不代計及之昨已函致星使申明此意將來當爲之稍

減酬應以期各利其利方爲允洽驛馬不准支應流差載在處分則例今欲除民協濟之慮獨以官馬支差不無所礙保用歸公一層尊處如何情形敝處不甚詳悉望將每年發銀若干發交何人通年用車若干每車發價多少有無累民之處望開單見示便與星使商辦買穀還倉價銀容俟核出數目日內擬將此款發存各府州庫存儲備糴免令外省催餉人員有多藏之議而州縣亦不至因領候掣肘想閣下當亦以爲然也並此附陳

復江蓉舫

前奉二十一日手函當卽具復頃接朔日惠示誦悉一一差徭



一事前接星使寄來章程三十六條後卽飭趙守等照鈔一分攜帶差次各就地方情形斟酌遵行總期於百姓確有實惠而於地方官無甚窒礙釐定之後乃可永遠奉行蒲解絳三屬已查核開單稟請星使酌奪辦理自必悉中機宜諸臻妥善星使仍擬堅臥東山弟亦未便過於勸駕日前函囑弟處代爲陳奏以星使之資望而論應以自行奏覆爲宜已切實函復當亦以爲然也鹽務減費一條既能議准亦可稍紓商力張丞又有專函前往何時可有確音盼念之至丁糧歸併老荒請豁一摺已奉旨悉照所請辦理現在趕飭刊刻謄黃本年上忙卽照新章徵納官民之累藉以稍蘇而浩蕩皇仁亦古所未有各屬

新荒尙未查報齊全亟擬早日入告以完此案而處處延緩不前令人心焦萬狀鼎丞已奉恩命卽與部文不日可到靜老尙無啟行日期此次遠行聞亦殊非易易也省門前日又得微雨麥苗當益暢茂收成可以預卜南路隴畝當更見青蔥慰甚慰甚

復劉毅帥

昨奉客冬十一月二十日還雲備承牽注臨風莊誦慙感交深弟以輕材久膺重寄力疲心瘁加以水土不服時爲客感所侵遠勞注存益增慙感幸骸疾已瘳惟體弱難禁風寒尙須日事藥餌衰朽之軀言之顏赧現在善後事宜清賦查荒次第舉辦

均已就緒至各屬倉儲罄懸亦酌量採購填還第糧價低昂不一倉廠又多坍塌猝難一律興辦不能不緩以時日耳客冬盼雪甚殷臘八前後得雪四五寸春頭又沛祥雲麥隴沾潤可望有秋差慰懸厯西事自崇使被議發言盈廷現聞舍姪劼剛有使俄之行惟期能不辱 命則幸甚矣邊圉未定正未雨綢繆之時我公中外繫望必能統握全局勝算獨操綏懷偉略尙祈便中詳示以慰馳系

復王竹侯

接誦惠書祇聆種切金嚴兩君以滬上捐款來晉助賑南路之民賴以全活者甚眾誠爲無量功德然非閣下軫念災區力圖

拯救亦不能成此盛舉尤令人感佩無似滬局所匯之三萬金已於年前由天津轉寄來晉現在金觀察因南路賑務已畢亦擬馳往直省與嚴君分任其勞直境被水之區其苦不減於晉非僅數萬金所能撫卹爵相飭籌接濟自屬萬不得已之計除由嚴君自晉移赴外以後續有來款均應撥歸直賑晉中不再分潤庶使幽并之民同被其澤以不負閣下飢溺切己之意但滬局已於十月截止存數無多能否再捐鉅款惟仗閣下鼎力勸辦使蘇浙紳民慷慨樂施而已此項捐款前已奏請立案酌獎其中捐數多寡不一本難核辦將來應如何分別給獎之處仍祈閣下斟酌妥協用慰諸紳好義之忱晉中自冬麥布種後

盼澤孔殷幸臘初屢霑渥雪新春又普睹祥霽爲近年未有之瑞實災區一大轉機至於地方善後事宜現亦將次就緒雖所需之款甚鉅賴諸隣封協助之力猶能勉強敷衍堪以告紓錦系

復郭子美

接誦保陽途次新正十日惠書承寄示練勇疏稿碩畫英謀誠目前救時良策果如尊議則是中國常有數十萬勁旅以備折衝禦侮之用何憂乎外患何懼乎強隣否則積弊日深驕惰而不可用萬一有跳梁小醜如當日髮捻初起時已難望其得力況欲揚威萬里哉閣下敷陳及此實宗社無疆之福然非小

范老子胸有甲兵亦不能言之如此精切欽佩何似兄抵晉之  
次年風鶴切警不得已而募湘勇士營歸劉南雲瑞雲統帶扼  
紮邊境歸綏一帶地方向有馬賊黨與極多商賈動遭刦掠兵  
役莫敢詰捕近年所有渠魁悉被該軍搜獲其患始息晉中連  
歲荒旱爲自古未有之奇災約計饑民五六百萬流亡布路然  
無有聚而滋事者莫非彈壓之力論者多以糜餉爲言不知弭  
患於未萌之先與用兵於生變之後其所費不可同日語矣此  
以見識深慮遠之難得其人也方今海防未固邊事方殷練勇  
一層尤爲急切之務想 朝廷必將大疏通飭各省一律照辦  
壯 國威而懾強敵儒將之規模遠矣晉中善後一切已辦有

頭緒去歲臘間得雪甚溥麥收可望豐稔年成旣轉民困或可漸紓堪釋廛系黎令管庫一席旣承鼎嚮當向王都轉處力爲推薦用副雅意如靜庵先生履任有期卽當飛函與黎令也

### 復金和圃

臘杪肅復寸箋計塵英察新正接奉惠函敬聆種切貴軍揚鈴塞外與強敵爲隣當防務喫緊之時原恃餉項充裕以嚴邊備而固軍心弟曾忝戎旃深悉其中甘苦萬無膜視之理徒以晉省連遭災祲籌辦賑濟自顧不遑以致應解尊部之款竟未能少竭涓助寸衷抱疚昕夕難安客臘曾交岳道二萬六千兩又飭河東道務於今正在鹽課項下設法撥解三萬兩并飭令以

後毋許遲誤去冬此間得雪已透今年似有轉機漦運或可較前稍旺既承台命惟有飭催司道迅卽籌撥源源報解祈釋厘系

復丁雨生中丞

客冬因病乞假本擬續爲引退之計第其時賑務未畢勢難一旦忽然捨去故假滿仍強起視事今善後一切悉就廓清地方日有起色而賤軀轉增衰弱於晉中水土尤不相宜數月以來足不踐閬猶屢爲風寒所中龍鍾之狀自顧難堪何容久蝨此間致形戀棧顧念 朝廷方以邊患爲重現雖改命使臣前往俄國更定條約尙不知能力全和局不至猝起兵端否邊釁將



開主憂倍切乞骸之疏又未敢遽瀆宸聰欲求以憂患餘  
生歸守先人墓廬不識何時克償此願言之慨然吾弟服涼藥  
見效想見體氣實強並無衰症今得外洋明醫診視自必漸增  
矍鑠所冀東山再起重副蒼生之望早紓宵旰之塵俾鄙人  
伏處田間得與耕夫野老共沐昇平之澤爲幸奚如風便仍祈  
時惠好音無任馳系之至

復馮展卿中丞

捧讀手翰撫謙之意肫厚之思藹然流露於尺幅中令人想見  
古大臣風度欽服何似台端文章道德當代韓歐久爲海內宗  
仰當此時事艱難之日閣輔重地雄控三邊非得老成宿望鎮

撫其間曷以繫苞桑而維磐石卽見舉生平所學一一施諸政  
事勲業之盛必有度越千秋者豈輕材淺學所能以涓塵上裨  
海嶽哉乃猶慙慙下問不鄙芻蕘此雖出於大君子集思廣益  
之誠而鄙忱已惶愧無地矣弟質本庸鈍半生精力早銷磨於  
金戈鐵馬中又所遇皆艱險危難之境未暇優游典籍考論古  
今以此塵土填胸垂暮而無所成就近年籌辦晉賑胥賴朝  
廷高厚之恩與隣封將伯之助倖免阽危然至今田野多荒流  
亡未復撫躬自問負疚方深蒙公獎許優加能無踖踖國荃飫  
聞大儒之名積三十餘年矣天假之緣滿擬霓旆出都取道并  
門距晉咫尺希冀元戎小隊暫駐郊垌可望盤桓數日以慰夙

昔之望旋聞鼎丞談及將由潼關西上刻下計已履新矣鼎丞  
經濟文章淵源有自昨已奏補冀甯道實缺晉中得此幹材於  
吏治良有裨益我公聞之當捫髯一笑也

致謝家福

素欽雅範未挹風裁寤寐之思山川無間頃若人觀察來并晤  
談之下述知閣下抱道衡門游心竹素希有莘之遐躅蘊微管  
之奇才可謂天半朱霞雲中白鶴使人仰望而不可企及矣乃  
前年豫賑此次晉捐凡蘇滬揚浙諸公所皆賴閣下力爲倡辦  
以故眾情翕服莫不踴躍輸將至今兩省災黎實已隱受其福  
是則閣下既有濟世之具又有救世之心而獨無用世之志求

之古人中且邈焉寡儔何況今日弟私忱景慕恨爲塵網所嬰不能一接高賢言論丰采以祛鄙俗方當以病乞休歸耕湘上南旋之曰必徑駕扁舟訪閣下於姑蘇臺畔一親塵談第未知閣下許之把臂入林否引領南望裁書敘心

復張朗帥

花朝後三日接奉客臘環章祇誦壹是晉中自去歲嘉平以後迭霑雪澤新春復普獲祥霽二麥占豐三農交慰頓覺災區氣象爲之一新從此子黎當有更生之望至於善後諸務近亦捫揣就緒惟年成甫轉民困未紓目前并邑蕭條公私竭蹶自維駑鈍幾無日不以隕越爲虞謬荷棗揚益增慙悚伊犁之事未

曾忠襄公書札

卷十五

五

卜能否轉圜然以左節相老謀深算其所規畫洞合機宜既已得其要領而麾下雄才命世偉略冠時功業著乎寰中威稜懾乎絕域尤足使彼族聞風帖服不敢遽肆鴟張現在李爵相移駐津門方擬購辦鐵甲礮船以資捍禦又加以宋祝三劉子貞兩軍分紮吉林奉天爲備豫不虞之計邊防旣固自有以伸正論而振天威此次使臣前往與之更議若能以理折之使就我範圍更爲易了近來彼處情形此間亦無所聞如得消息卽當隨時奉告左右

復李仲雲

月之念四日連接客臘兩次惠書並匯到長平紋銀四千兩晉

中善後事宜均已就緒惟年成甫轉民困未紓刻值東作將興各路災區紛請牛力籽種補墾荒地需款甚鉅雖經陸續籌發而庫儲告罄屢年所停京協各餉今皆催解孔殷勢難從緩竟不知作何羅掘令人焦灼殊深吾湘捐款仰承鼎力勸收計前後實其匯來長平銀一萬六千兩此等義舉足以泐金石而感神明不惟此地窮黎毋忘銜結而已現在所收之四千金已由善後局繕發印收仍交日昇昌帶呈台察以備存查

### 復江蓉舫

頃奉十六日排遞手函如親話言具悉種切蠲免丁糧老荒一摺已奉 恩綸日來由局刊刻謄黃不日即可頒發新荒一案

至今尚未齊全固由各州縣之一味因循究之澈底清查大約亦甚不易卽如各屬老荒業經彙案入告而續報者尙復紛紛未悉原查情形准駁均無從批示惟有暫置緩議俟新荒告竣再行設法變通陳奏如果替百姓去一分苦累艱難亦何敢稍嫌煩瑣惟清查業經兩載必於事後稟請復查更正抑思何日方得告完耶臨汾控案已飭穆守提案研訊確情方伯處自應另有委員會同方足以昭慎重減徭一節丹翁銳意舉辦祇求無所窒礙亦何樂而不爲所定章程三十六條初讀之似尙無扞格之虞可以照辦第各處情形不一必定一畫一程式使人人均就範圍一時勉強奉行以後必致掣肘似不若且俟各

處查報到日再行核定永遠章程丹翁處亦已將此意委婉函商矣總之事屬可行決不忍稍拂其訓以致意見偶歧也榆靈兩縣與他處情形不同省中亦早有言及者至駟草概交折色正不獨該二縣辦理爲難趙劉陳三守出省時迭將其中一切情形詳細告知囑令詳加體察審慎稟商辦理或仍以交本色爲是該守等均是能人當能領會耳尊庫津貼安邑車馬局銀兩並池腳鹽駝津貼用錢統計爲數甚鉅向係車馬局之贏餘今俱改歸道庫局紳等自斷不能樂從惟既免其供支縣中並無出入道中所需差車差馬概行自備局中亦無所藉詞惟北相駟因此而攤派益多似與均減徭役之本意相背其應如何



辦理方利官而不病民張丞趙令會商縣局後自能斟酌變通  
倘均樂從範圍請卽具牘備案第處無不照准施行也買穀還  
倉本銀均由司委員運解各府州存儲備用現正青黃不接之  
會採買總在秋冬間矣惟冀年穀順成本年能一律購入倉  
乃爲大幸狼鼠之患間已稍減再得閣下示諭札飭各屬益加  
搜捕認真自更易爲埽除慰甚慰甚鹽務內稿婉轉圓到加潤  
三竿之數亦不過多有此則事無不成無此則斷難有濟大權  
大柄胥視此爲轉移來書歸功鄙人讀之益增慚愧張丞既有  
減差之役自祇可從緩赴豫丹公覆摺初八日由駟馳陳曰內  
計已奉 諭旨能否邀允時已專函詢之倘有展 觀之行則

措置川貲亦不可少方伯與玉山面議將意之法可以照行統  
望相機辦理劄剛舍姪奉使俄疆大難題目刻下尙未得信究  
竟如何議法亦無所聞荷承關念褒獎殷拳感銘無旣尊體偶  
感清恙念不可言固由火熱使然實亦蠱勞所致尙祈格外珍  
玉靜攝禱切禱切岳經歷已赴差次仍祈訓誨及之俾得及時  
自効爲荷弟與方伯廉訪鼎丞所定丹翁減差十條鈔寄雅閱

復丁愼五

頃奉手書並另箋一一讀悉承示各屬近狀詳明周切凡爲地  
方布置僚屬籌維具見仁愛用心欣慰欣慰荒地招墾需款孔  
急除虞鄉外各處牛價均不甚多擬於運庫先借銀萬餘兩發

交各屬擇要散放俾不誤東作之期且已與蓉舫觀察商明卽可照辦至每畝發銀三錢係屬定章如此今虞鄉已經丹帥核明以每畝五錢給發他處事同一律似亦未便兩歧然蒲屬而外若均援以稟求又從何措此鉅款應付此事由省定議誠恐未悉各屬情形多發浪費帑項少發無濟民艱同一不宜或仍照舊章或量予加增一二錢弟與方伯均無成見祇求於百姓於荒地實有裨益卽請閣下放手督率各屬核實施行又散放此項銀兩方伯之意必須籌杜冒頂而無主有主更分晰爲難務祈飭屬先行確實清查不可因爲時迫促含糊從事是所切禱虞鄉錢糧稟牘纍纍幾至無所適從刻下總應以現奉謄黃

爲准該縣五年分錢糧仍應徵收一忙蠲免一忙以歸劃一至  
前經該縣查後請將已完在官者作爲六年上忙雖經批准然  
核與膳黃不符應作罷論差徭一事永濟臨晉差務浩繁辦理  
甚非易易前由丹帥寄來擬定章程三十六條內中頗多窒礙  
今由省另擬十則一面寄商丹帥一面抄寄趙陳劉三太守仿  
照清釐然亦祇就大概而言至詳細章程須俟各處查報齊全  
方能因地制宜定爲永遠規則也省門地氣尙潤近處青苗已  
出土四寸餘矣南路地氣更暖隴頭自更見青蔥慰望曷旣弟  
外感仍未痊愈藥爐不能遽撤興懷時事殊切焦思

致許子純

前以鳳臺鹽事接到公牘當經批發計已達覽弟滋勞薪軸壹是如恆所喜各處雨水調勻民間生機日暢棠境麥苗聞極茂轉瞬收制定卜豐登荒地招墾能否踴躍爭趨念念鹽店一事頃據何總兵稟復該店存鹽尙有五十萬觔新運二十名月底亦可到境以歷年銷數核計約可敷衍至八九月間賴牧任用非人以致虧累甚鉅現已批令賴牧先將課項官本趕緊清完其店帳虧賠須俟帳目算清再行辦理至此後承運事務勢不能再令賴牧經營且近二十年來新章官運官銷原以鹽觔民食攸關由現任地方官運銷則緩急不致貽誤賴牧遠在平定本有鞭長莫及之虞是以批限三箇月由閣下招商接充以

此公事而言固不得不如此批示查鳳臺鹽務銷數尙旺經理得法利息亦當可觀其所以接辦無人者大約因舊店既有虧空或致因人受累其實舊店虧項悉由舊主自行清完絕不與接手者相干務望閣下迅卽訪招股實之戶並將以上情形諭知俾得放心接辦屈計三月之限爲期尙寬趕緊招待決不致誤因恐閣下未悉此中底蘊用特縷晰

### 復劉瑞雲

頃接前月二十二二十四兩次手函具悉十一日復書已登籤掌蒙古趁地一事前接嘯珊觀察來書已備悉辦理之甚非易易今接致吾弟覆信所云此事禍源並拔本塞源之計確係實

在情形未可輕率從事現在蒙兵已退暫時自可相安總之重  
利輕命不獨蒙民爲然卽祖種蒙地之漢民要亦無不如是故  
每一爭逐動輒死傷甚多在我輩視之以爲駭人聽聞其熟悉  
該處習俗者無不以爲常事此卽嘯珊觀察所謂旋逐旋放屢  
放屢趁現固不能遽請封禁亦礙難遽請開墾祇期不致釀成  
事端好在蒙地事權非我所屬惟其力爲排解以聊盡我心而  
已一切應俟松丞回來再與嘯珊觀察妥籌核議恐亦未必有  
良策也所慮秋收在卽爭割糧石等案總不能保其必無全在  
薩廳先事就近調停不致臨時多生枝節耳

致劉南雲

廿八日排遞一函並 廷寄公文等件計尙在途次頃據李中堂來信聞俄人因赦謙卦之罪未如所願意欲構釁派海部尙書來沙弗斯基率兵船三十餘號已至長崎俟劄剛到彼國議條約不成再遣使至京定約并聲言在大沽口山海關等處登陸大舉入寇等語又探聞有八九月必到華邊之說大局若此不堪設想賢弟接到前信想已可起程 國家有急臣下義應星馳補救萬一 朝廷羽檄飛催則無可以藉口惟望仁弟稟明高堂立刻起行單騎扁舟早到都門迅抵湘毅軍營壘爲三軍之司命壯全楚之威聲實誼之無可緩者也連日疊次函寄且可騰照瑞芸同湘事奉庭闈尤爲兩得瑞芸整飭營務派馬



探問由包赴山海關路程若干岱岳之營卽由大同大路前進  
定於中途會合齊隊前進紮於近畿百餘里外聽候兄到同往  
關門令弟想必能沿途秋毫無犯以保湘軍令名萬一俄人果  
來真有仗開則非名將登壇不可以成汗馬之奇勲仁弟鴻名  
久著海內義聲甲於湘中此次聞信定必據鞍自雄彌增當年  
英氣企切盼切兄七月初三交卸篆務摒擋旬餘添親兵小隊  
以壯行色大約十六二十日可以起行北上八月初旬可以到  
京湘毅軍開差則須俟接十六日准的函牘卽定吉期進發八  
月初間亦可到近畿百餘里以外問樵千人仍紮太原張建侯  
千二百人移至包頭兄到京後恭聆 聖訓然後方可定計施

行屆時仁弟到京即可同至山海關也

致潘琴軒中丞

弟晉陽承乏厯碌增勞自丁丑莅任下車伊始卽遇亢晴自是災祲頻仍民間疾苦情形不堪言狀方殷殷以議賑而庫藏闕如幸荷 聖澤汪洋截漕發帑並得仁鄰周卹撥協勸捐數載以來災黎垣堵相安而不爲飢寒所迫致滋事端者殆由是也至去冬而雪澤渥沾今春復雨膏壘沛天心已轉人力可興爰頒發籽種施散農具與一切善後諸政次第舉行差喜四境敕安農田芄茂可望豐收惟受災過重元氣已傷非生聚十年難期復舊耳弟賦躬孱弱與西北水土不宜入晉以來常常抱病

頻年尙能自振客冬而後精神困憊步履艱難昨因感受風邪牽動舊創竟至不能自持不得已據情入告籲懇開缺就醫欽奉批迴賞假兩月俾安心調理自天聞命兢惕益深祇有勉力支持趕速求治倘得孚占勿藥庶可按期銷假以圖報稱也近來俄事未諗若何聞都中疏論頗多有無善策現在邊防甚切想元勳必有良圖若衰病之軀能使寄跡林泉則幸甚矣

致丁愼五

日昨奉復一函計可先此達覽薄廩應發籽種銀兩現在節屆清明若再遲遲必致有誤東作前接手書擬先於運庫借銀萬

餘兩擇要散發刻下已否領到查核寄來清單共需銀四萬五千兩有奇除運庫借款並各處收存牛價外所短甚多現與總局商明所有不敷之款請卽由各府州在此解到儲備買穀價銀項內先行動放俟載清實用多少卽日由司庫撥款歸還庶各處均得應手不致有誤東作至每畝應發五錢四錢三錢二錢或分別災重災輕以次第爲增減全仗閣下督率各屬核實施行總之大災之餘以培救元氣爲主小民以食爲天多墾一畝荒田卽多救一分元氣此次散放籽種固須核實毋任冒濫尤貴從速從寬務使農民聞風踴躍墾耕不致視此舉爲具文盼切禱切

復江轉飭

頃奉二十八日手書具悉前後各函均已達覽惟清恙尙未大  
愈念不可置本係風火所致收口之際更須格外小心避風尙  
祈隨時玉珍是所至禱新荒地畝各屬查報已齊由局核明日  
內卽可入 告至招墾荒地應給牛工籽種等銀前月底已酌  
定章程札飭各屬遵辦現正播種緊要之會不可再遲先以各  
價挪移各州縣當可應手至三錢一畝實有不敷卽一律給以  
五錢亦無不可惟前次既有三錢之議是以此次札內不能不  
以災輕災重爲詞分別等次究屬公允想經辦各員當亦能領  
會也減徭一事尙謂丹帥所定三十六條窒礙甚多卽省中所

議十條亦不過就大概立論總之各處情形不一非俟查明不能定議今丹帥銳意舉辦定須處處均就範圍非但礙難施行且恐轉滋流弊日內未接丹帥來信祇可隨時相機緩商貴署草勛悉予豁除津貼保用兩款一併裁革痛快之至抽收駝用改歸由縣經收里下可以少派錢文事屬利民莫大功德至北相來往差事置備底車供支既係有便於民自亦可以照辦惟隨糧徵收之二百文設遇歉收錢糧蠲緩此項應如何徵收不致無著亦應預先議明俾免臨時棘手閣下慮事周密一切定能斟酌合宜弟處祇祈有益於民無礙於官無不可以照准蒲絳等處辦理有無眉目仍祈閣下督率妥辦禱切盼切戊寅綱

引本月可以掃數慰甚轄境又得透雨麥苗裨益更多南路四月即可收成民間生機日暢秋糧播種自益踴躍爭趨矣弟夙恙未愈客感日甚藥鎗不撤迷悶莫名現幸善後事宜一一告竣病軀久戀似非所宜月內卽擬具疏瀝陳知念附及

復閻丹初

初間因久未奉書渴念無旣初一初九兩申尺一度達典籤昨日欣奉初四日賜函備承指示周詳語語切中機要感蒙不棄一再推誠見商捧誦迴環仰佩曷旣差徭一事弟夙聞爲累民之政而其中實在情弊未能周知是以一擬清查卽切求我公指教以冀裁減得中肯綮經此次議定新章之後可以久遠

行此則弟之苦衷所由不揣瑣繁屢屢奉瀆賜教也迨奉到惠寄章程三十六則當卽出示方伯廉訪諸君子公同籌議亦僉云條分縷晰計慮精詳於體卹民艱之中仍處處爲地方官留有餘地步弟逐條細繹祇覺所減甚少無不可以遵行隨卽諭令清查各屬委員各鈔一分攜帶倣照施行俾有遵守後以各屬情形不一有宜於此而不宜於彼者有此則病民而彼則便民者事在因地制宜不得不於既定畫一規程之後稍事變通逐日會商方伯廉訪諸君各有所陳先遵前十條其後二十六條則就大概情形以繩各州縣舊有三規模而定章則非敢籠統以求處處可行處處皆是也今奉書詳加復核除院票一層



誠如尊意祇在核實認真不在衙門大小或由院或由司均無出入無庸再議外至由牧令自爲檢查一條從前靈石辦法卽是如此年深月久縣中竟視此爲自然之利拉車拉騾之弊幾至不可勝言不知者但云騷擾客商實則本地車騾亦何嘗不受其累查靈石本地車騾最少民認馬價之後則諸事不管矣此由官包辦亦全在官之能顧百姓與否徒法實不足以自行全在乎得人耳晚近宦場大率皆自爲計是以此時之更一議定一章較之從前又復難易迥別可浩嘆也歛草一節在民固有多少爲難而在官亦有多少不便近日省城官牛局買草則非七八文不能得一觔尙是借首縣之威令也營中買草則十

二三文矣折價每觔六文以尋常草價每觔三文計之則爲極多而民間居奇售之於官則又六文不可得一觔官令每觔減半實仍與不減同大秤之弊害民如此不得不定折價折以六文爲率草賤處或酌減貴或酌增有願繳本色者聽其自便方爲兩無妨礙除弊於無形斯爲盡善盡美想我公當以爲然蒲解各屬已蒙諭令斟酌籌商弟處當批令妥辦並諭蓉舫觀察就近督率遇事稟承指示近日當可有復音來也總之關繫通省均減二字要無處不當遵守奉行至應如何均減方能合宜必須逐處查明各州縣與紳民地方官三面定議斟酌立論方可施行現復分飭印委各員趕將從前弊竇及此次如何裁革

庶可卹民情形詳細稟報前來以便彙求裁奪趙守所定平定州摺三扣呈閱係與紳董面定之件似尙不擾累也在我公空空洞洞毫無成見於其間而在弟亦祇求實惠在民事可垂諸久遠更不敢稍存意見轉致窒礙多端第才拙事繁不能不以瑣碎上煩賜教一俟各委員稟復到日再將擬辦情形函請商酌

復張松平

頃披藻翰承示重修岳陽樓工繁費絀必須再湊萬緡方可集事業經台端商允李仲雲諸公於南嶽廟經費項下酌分數千金以資鳩庀想見閣下理煩治劇游刃有餘故當此政簡刑清

之日特爲地方培植名勝雖需款甚鉅集資實難然以賢太守主持其間自可告成於不日此等盛舉當與茲樓並傳千古矣弟遠隔晉中睽念鄉井苦於愛莫能助猥荷慰勸獎藉負歉滋深聞嶽廟工程浩大非十數萬金不能修造未必所籌之款果有贏餘然岳陽樓爲一省勝蹟關繫亦重旣經閣下多方擘畫措就萬緡以爲經始之費其勢不宜中輟當卽致函諄託仲雲諸君子設法酌分以成閣下之美庶幾洞庭名勝今古常新是皆閣下之功尤爲邦人之幸也

致李蘭蓀

前因周守方牧等入都肅枉寸箋藉攄蕪悵國荃忝膺邊寄於

今三年德薄材庸無裨時局前月舊創復發加以外感湯藥雜進病勢轉增初尙勉強撐持冀就痊可不意游移彌月危症疊見漸不能支此地旣無良醫又乏藥品更無方術可以力挽沈疴再四躊躇不得不瀝情籲懇 天恩暫予開缺俾擇醫藥較便之處趕緊調理庶免耽延日久患入膏肓致爲 聖朝棄物疏中所陳病狀均係實情並未敢一字捏飾惟祈俯鑒愚悃力陳於 聖主之前曲賜 俞允恩同再造感激曷涯國荃以一諸生屢點疆職受 恩深重迥異尋常時事方艱斷無藉詞引退之理實緣病因至此失今不治恐不免痼疾終身區區苦衷必蒙洞察現在晉省年成已轉善後事宜亦均就緒地方日有

起色民困可以漸紓國荏去留無關輕重素叨摯愛務乞矜全  
如果俯如所請得以擇地就醫半年或可望不致殘廢一俟病  
愈卽當迅速赴都銷假泥首 宮門求賞差使並躬詣崇階叩  
謝福庇稍伸環雀微誠無任懇切盼禱之至

復郭筠叟

三月十二日接奉賜函猥蒙獎藉殷拳祇領之下欽紉難名俄  
事旣爲前使臣所誤改命劾剛前往未卜能否定約當日盈庭  
集議羣策畢陳然未有以爲責在左相者一經道破覺事理確  
不可易豈非睫在目前人反失之歟尊論伊犁之事無隱不燭  
可謂見垣一方居今日而圖治安捨洋務無可講者僅得一買

生又不能用此真可以爲太息流涕者也晉捐一事深賴鄉邦諸君子之力籌款甚鉅弟方感荷無已不知珂鄉局紳何以反被誣控聞之心竊不安現在周樹藩並未來晉是否赴甘此間亦無所聞其控府控臬之案公論具在勢必不行如果潛往京控亦必發回湘省李中丞明鏡高懸不使貴邑紳耆因此受累乞紓厘系晉中入春以來暘雨應時麥收可占豐稔善後諸務近亦一體就緒從此災區或有復元之望惟賤軀日形衰弱抵晉三年之久幾無日不在病中近復屢感風寒益難措拄已疏請開缺調理果如所願把晤之期當不甚遠近來杖履清閒作何箸述志城三先生仙遊鵠原之痛聞之扼腕亦惟委之定數

而已尙祈頤養康強勉自寬解爲祝

復李次青

暮春十二日接讀手書知尊意欲將晉賑始末詳加紀述如南  
豐之作越州救苗記俾得垂法後世媲美前賢厚誼隆情至深  
銘佩弟經營賑務前後三年窘迫憂煎爲曩歲軍中未嘗之苦  
誠得椽筆著之於篇以傳不朽撫躬亦可以自慰此眞弟所求  
而不得者惟被災之區至八十餘州縣飢民至五百餘萬眾  
朝廷所頒帑米鄰省所籌協捐本省所發倉穀及各處之義捐  
等項其計費逾千萬此其有總數可稽者至於粥廠病房與夫  
揜瘞收養之數並各省勸捐出力之人歷時未久已難詳查刻



下清理善後事宜甫能就緒猶無暇及此遲一二年案無積牘然後將各種數目一一確查分晰開列並奏疏等件寄呈台覽彼時再請閣下作爲鴻篇以昭示茲世或者鄙人竟得附於趙清獻之後亦未可知至若閣下之文則固早以度越南豐也哲嗣已捐過班寶爲忻慰保加二品銜又爲例所限顧念閣下勞苦功高而爲數奇所困他日天必以報之於哲嗣使之早躋顯秩厯踐亨途以償閣下未酬之志其理固有可憑者賤軀日形衰弱近又屢感風寒無刻可離藥劑歸志已決但未卜遲速在於何日耳

復閻丹初

初十夜奉到初八日第四號賜函謹悉大疏業經繕發至爲欣  
佩至前稿請處一語固知我公忠愛之忱有發於不自己者但  
因區區管見所及輒爲節去公不責其謬妄反甚加獎許益服  
大君子捨己從人之量真不可及也諸謹條復

一差章三十六條誠經世之大文掾時之良法此間僚屬莫不  
同聲嘆服以爲行之可以百年無弊非僅爲善後計而已昨已  
發交司道公同面議並令陳趙劉三守分往各處體察情形認  
真辦理如其中尙有應加斟酌之處仍稟候核奪總期折衷盡  
善得以久遠遵行至於靈石榆次等處必當設法蘇濟不使因  
公受累庶廉吏有以自存墨吏無所藉口公謂恤官乃能恤民

誠扼要之語確不可易此事貴於實辦而不貴急於陳奏如試辦而無窒礙奏請諭旨之後泐石駟亭使過客見之不肆措勒公養病於山中而於民生利病仍未嘗一刻忘懷則正氣常伸善類咸有所歸依也

一俄事近無確耗外間甚傳俄人不欲反約有口角之說殊不可信但彼性強狡較英法尤不可以理喻前使既受其要挾恐非口角所能挽回劫剛此行未識能無辱命否朝廷方上下交倣爲自強之計與前代之屈意求和一味怯憚者迥異當不至遽有意外之虞

一冀甯道實缺已補鼎丞觀察晉省得此幹材亦殊有用靜菴

先生病已痊愈昨經兩江制軍奏催飭赴新任計出月初總可南行

一南運保案應行查覆各員如尊處業已核定卽望迅速賜寄以憑彙奏

一省垣雨雪優霑郊外麥苗已有出土一二寸者豐登有兆與我公同深慶慰近日葑體諒益康善細玩來書精力彌滿仍復秀削絕倫此有以徵公之福壽彌長也賤軀屢感風寒日與藥鏹爲伴龍鍾之態自覺可嗤蒲柳之與松柏固不可同日語耳

復鮑春霆

花朝後接奉密牘小除日惠書欣誦再三恍如面晤因悉前在

河防曾遞寸牋已塵英鑒特環章則不知浮沈何處矣閣下勲名彪炳震古爍今卽韓彭絳灌之儔詎堪爲伍一旦功成解組娛意林泉遂脩然於塵壒之外今且於養疴之暇兼悟攝生此又子房所不及者以視鄙人憂患餘生久嬰世網何止鵬鷖之別乃讀來翰殷勤懇摯藹然念舊之忱而於下走尤獎藉逾量是何用情之篤而見愛之深耶感佩之餘慚汗不已晉省年成漸轉地方頗有起色善後事宜近亦次第就緒惟賤軀日形孱弱不免衰病交侵方擬上疏乞骸爲歸老田間之計又未卜能否如願昨 朝廷以伊犁未復而俄釁轉深蓋爲前使臣所誤因與以重處改命舍姪劼剛前往與之更定條約劼剛已由英

徑赴俄所如能以理挽救不致遽起兵端斯卽中外之福也現在沿邊均有重兵扼紮海防宜嚴加豫備或者彼族聞風帖服知我無隙可乘仍可善全和局然彼之所以弱視中國者蓋狃於咸豐時天津之役見科部兵眾一戰卽退耳若以閣下當之風雷並擊山岳俱摧彼仍敢自詡天驕乎聞台躬舊傷平復體氣日強歡慰無似天之所以眷祐盡臣者正留備非常之任觀其時勢恐尙須閣下一奮餘威重建掀天之業山林一席請讓與衰憊之人可也俄事不過兩三月後卽有定局俟得確耗當再布聞惟希迅惠好音俾釋懸系臨穎無任神馳之至

復瑞睦庵

頃奉手書承示綏遠爲近邊要隘擬請添練馬隊千名以壯聲威兼助湘毅軍之不足宏謨碩畫仰佩曷可勝言祇以庫款支絀異常目下立營之款旣不易籌更恐添設之後餉項設有不支難以爲繼不得不慎之於始前後據實奉達良以此也今奉賜書復囑芝苓方伯悉心妥籌祇以庫空如洗竟難著筆又確查從前旗兵馬隊章程前辦烏蘭察布等派防馬隊支給口糧係仿照綠營官兵每兵一名日支銀三分馬每匹日支銀二分後以尙嫌不敷每兵一名於日支銀三分之外加給銀二分計每日支銀五分每馬一匹於日支銀二分之一外加給銀一分計每日支銀三分旋以餉絀凱撤此次來諭添設馬隊卽照此數

籌發亦恐辦理不到 廷寄意在裁減兵勇未便按而不行反  
備增竈之舉閣下公忠體國榮莅新任卽在指顧部下諸將雖  
以有事爲榮然恐未計餉糈之難也仍乞台端審定示復是所  
盼禱弟昨以衰病增劇具疏乞退 恩俞並渥蒙 溫旨悚感  
莫可名言當時事之多艱實顛踣之可慮尙祈箴言遠錫俾有  
遵循是爲感禱

復閻丹初

月之望日遞十六號信度呈台察牛力銀兩關繫勸墾招佃給  
散似無可緩現在省南各屬已有動用穀本支給者其未領州  
縣昨據蓉舫觀察來函謂運庫尙有存款堪以墊撥不必借動



穀本已囑令照此辦理如果所辦核實將來秋穫豐盈荒地更可多闢至差徭一層汾太已稍有頭緒如劉守稟承訓示再將平霍差章一律釐定則善後三宗弟與我公悉以舉其崖略縱有罅隙後來賢能當可尋緒補綴不敢謂我輩現定章程胥可一成而弗變也尊恙聞未元復馳系靡已邇來時艱日亟憂國深衷自難已已但我公清望所繫尙希珍衛柱躬用備隆棟之用是所禱切賤恙逐日醫調外感似已除盡惟正氣虧損尙須漸施補劑方可平復不日假滿擬再懇展一兩月假期而弗再請開缺期以衷於出處之義而已知係塵注特以附陳

復閻丹初

月杪遞十八號信布謝種切差徭一事我公擇以至仁行以至寬於民有益於官無損卽中飽之徒亦皆稍留所養俾得就我範圍大賢之用心實亦苦且勤矣尋繹再三傾倒無似本應敬如來教抄行各州縣核實遵辦詎劉守已到曲沃將明公所定六州縣章程稟送弟處因卽批准其有定章之外明公所籤及連日弟與方伯廉訪所商者並於稟內詳悉批示總期減一分之差攤省一分之民力爲西北遺黎培此元氣而已至我公密函所謂垂涕而道弟雖薄劣何敢不仰體盛意奉揚仁風仍令齷齪子腸肥腦滿甘爲清議所不許耶諸謹條復

一擬示嚴禁地痞最爲切要之著蓋晉民疾苦由於差徭差徭

積弊由於地痞若害苗不去嘉禾不生於現在減差大局殊有關係尊示刻已札局刊刻發給有差州縣認真諭禁俾此輩咸知歛迹新章便可通行

一霞舉先生業經遵囑將洪洞正紳舉出七人均屬廉正自愛之士刻已札知該縣照單邀約便可開局辦公其舊日車馬公所有武生宋姓者逞私漁利最爲地方之害亦密飭該縣拘案究辦以儆其餘

一靈石山田峽峭地瘠民貧每糧一兩攤差五百文之多民力不能毋念應將紅氈與每日雇備驢騾五千文兩項刪除倘署用不敷應爲再行捐攤並將該縣舊有津貼代爲定章催解不

令偏累已於劉守稟內批明毋須再令李令來省

一臨汾災重民貧已非一日似能早定差章即可早紓民困況潘令人尙慈祥又於平陽情形最熟若由潘任邀紳辦理較李令初到者尤有頭緒且風聞李令尙有不願到任之說故不能日久相候已於劉守稟內批明此意令其督飭趕辦

一霍州洪洞臨汾三州縣洪洞介處其中所有差事係屬同途共軌今霍臨流車通年均以二千六百輛爲率如洪洞獨定二千恐涉兩歧應改爲二千六百輛以昭劃一

一曲沃流車通年亦定二千六百輛兵差在外軍裝器械在內似不宜別立兵差車二百輛一項名目且每輛亦不容折錢二

千八百文之多應查明刪除

一地方車柜擾累無窮此次清理徭役似應有弊必革已批示劉守如能將沃靈兩縣差錢酌提款項購備底車若干軻輪替支差卽將車柜裁革以蘇行李之困

一平介號草平則交收本色草數亦多介則折價在六文以上同係大駟州縣定章未便兩歧俾資藉口當卽飭局飛札示遵統照明公所定每日折交號草四千文章程以示劃一

一平定差章我公謂爲妥協自因道里太遠難於懸定但該州地處深山民間向無車馬又該州民人向無支差名目如今按糧攤錢不肯畫諾統令官爲雇辦力所弗支任照舊章辦理則

票差四出擾害萬狀通省有減差之名而由京入晉首跼騷擾如故亦非心之所安紳士不得已公稟創立里局之計能否通行以垂久遠尙須試辦立案公更有他策用蘇此邦之困否劄剛啟行本有四五月間之說近聞又有密諭未得其詳喊國以中俄要約難定恐乖和好欲居間代爲調處果能無傷大局免事兵爭自屬目前之幸賤軀近日差有起色惟心氣虛損眠食猶難照常承公厚囑亦惟加意調理而已

致閩丹初

端節間曾泐詳函奉布一切差徭一節查減已有眉目其中疏節闕目雖所不免而極衝州縣所省已多果能日久不變公爲

晉民造福者大矣昨日已將善後事竣具疏陳奏 禧聖久未  
臨朝初十日欽奉進醫 諭旨奏保陽曲汪令守正咨送入都  
已於十三日趨程前進若 聖躬所抱何恙現在起居何似究  
無實在消息翹首 闕廷至爲憂念俄事前經英法公使喊唆  
嗎赴津商辦請先釋崇罪再議轉圜由總署與峴莊制軍奏聞  
比蒙 俞允而京朝士大夫公論多不以釋崇爲然又釋崇  
諭旨有暫行免罪仍然繫獄之語喊使以事近鈐制益啟俄人  
疑怒勢有不願代爲和解之意僅憑劄剛赴議以情事測之恐  
無所濟現在該國兵船十餘號日在東北洋游弋勢殊叵測萬  
一深入我之所以籌備者未見確有勝算弗審將來作何完局

賤恙醫調三月傷疾幸有微效惟心氣虧損過甚急切斷難復元既未備再申開缺之請又不肯久冒戀棧之譏擬俟續假期滿或續假一月方定行止所幸善後事宜刻已就緒如勉釋仔肩尙不至多所愧負耳種關廬系特詳及之

復閩丹初

昨泐覆箋並附寄腐乳金腿等件交閩委員順呈不卜何時呈覽頃奉初四日十三號手示祇聆種切惟奉 命督辦山海關防務本懼不堪負荷第以時局艱難未敢瀝情固辭然所部不足萬人又並非舊日所統加以久病之軀不能躬冒矢石爲士卒倡似此光景其能免於顛越卽屬萬幸迺承我公勛以壯猷



期以遠略斷非鄙人所能勝任近聞彼族厚集兵力在於奉省  
游弋乘隙而動雖虛聲惆悵在所不免而東俄疆宇毗連若果  
逞其蠶食之心未必僅爭互市之利是和不和權在於已而戰  
不戰主之於人此時諸難預計所幸 禧聖近經薛道汪令診  
視擬進益氣健脾方劑頗見功效實爲近日第一快意之事昨  
奉 密寄令鮑春霆軍門招募萬人限八月乘輪到津作爲伯  
相與國荃兩路策應之師如果依限趕到或者增茲勁旅足備  
京輦緩急種關廛系特詳陳之至頻歲以來所辦捐賑善後事  
端無不仰叨擘畫藉免愆尤此德此情久已銘諸肺腑固非一  
二膚詞所能稱述萬一向勞齒謝殷殷繹誦再三徒增慚汗現

在趕爲料量行營事務約二十二前後卽當啟程北上仍祈垂  
念石交時惠德音俾資遵守是所企禱

復江蓉舫

頃奉月之初三日手函誦悉種切南陽官運整辦本屬爲難因  
來函有乏才之嘆故有無論鹽務省城人員儘可指明詳請今  
旣擬派張丞先行料量襄城爲兼顧南陽地步卽請閣下相機  
爲之祇期有裨公事弟均無成見也蒲解差徭雖已次第辦妥  
而永濟南北局未能一律合轍現在鄭令旣已到任不卜與未  
開荒地一一能辦理就緒否各屬錢糧迄今完解寥寥自係玩  
視於前刻難收拾之故此種存心誠所未喻常姓責釋後能否

歛迹而丹老匠月無信亦不識其近履何如 召用一層至慰  
輿望然非得人汲引亦難於無意期之協甘常餉五十二萬十  
年以前分解甘肅各營因袁筱翁奏歸西征糧臺金和帥又有  
每年請協甯夏軍餉十八萬之奏經戶部奏奉 諭旨於此五  
十二萬餉內以三十萬解交西征糧臺以十八萬解交金營下  
餘四萬亦令解西征糧臺其蘭州應需餉項由袁左自行接濟  
以清款目迨十年俞前道以此項協餉究應勻解何處詳請部  
示復經戶部議明行令照九年撥解之案以三十四萬解交西  
征糧臺以十八萬解交金營迭年以來均係照此撥解節經奏  
咨在案此兵餉改充軍餉原委查照尊處來詳與弟檢查無異

今甘肅僅據常年部行旣無以甘肅常餉仍還甘肅之語又未以甘肅制兵已復詳將西征軍餉解還甘肅兵餉之批而河東卽置西征要餉於不顧十年部示於不問徑以大批銀兩交委員管解回肅將來左相和帥一有責言弟與閣下實無從置喙再四思維自以照詳咨部請示爲一定不移辦法繼思咨請部示若祇據楊石翁代印咨文農部仍須咨詢左相展轉耽延不但無益甘省兵精並且有誤西征要款此其一可慮也又甘餉本有舊欠農部如意在調停以五十二萬常款仍歸金左其甘肅兵餉令河東酌解舊欠將來甘省執持此文在我反無解說而甘肅增一萬之餉西征卽少一萬之數是欲求清界限轉令

滋累無窮此其二可慮也有此兩端窒礙是以咨請部示一層暫作罷論業將白同治九年兵餉改作軍餉原委及現於僅有一紙常年部行無憑改解甘肅并礙難詳奏苦衷函致楊石翁請將此項常餉或分三十四萬改解甘肅或並金營之十八萬一全改歸甘肅與左相熟商辦理一俟見有明文無不踴躍爲助如驟難定議其西征軍餉亦必源源籌解好在西征銀兩亦須由甘經過綜理既屬一手緩急儘可相通至提餉委員因事無定局定意等候甘肅回信再決行止祇可聽其自便已切囑石翁於接到弟信後作何辦法趕覆一言其時看彼來意云何我等再作計較尊詳姑且批迴備案若前解三萬旣已啟程當

卽由弟補奏均請紓念爲幸賤恙邇日調理步履精神均可勉  
支擬於月望前後疏請 陛見幸邀 俞允卽交卸啟程惟  
禱聖病久未痊日昨奉 寄諭飭令各直省保舉明醫咨送入  
京已舉子常大令限於十三日啟程北上矣種系遠念特詳及  
之

### 復廣夢堂

捧讀琅函猥以賤恙陳情致煩殷注詞義兼摯感篆五中弟此  
次陳請原無他念實因三軍到此便與水土不宜當賑務喫緊  
之時未敢遽萌退志滿望日久習慣或可相安不謂至今依然  
格格早歲年力強盛一任水土甘苦頗不經心近來精血衰頹

實不能耐因之舊創乘間而發寒邪伺虛而來雖日與藥梳爲緣總未漸推漸遠方今 聖天子禮羅宏被從前休沐舊勲悉起田間而弟必欲以朽鈍之身苟且因循久妨賢路如 君國何如地方何此卽閣下所謂萬不得已之苦衷也不圖未蒙恩准乃賞假慰留閣下又有關愛之詞來相勸勉人非木石何遂竄棄自甘現惟亟亟醫治如月內精神復元自當遵囑銷假斷不敢矯志鳴高也

復隋聿修

頃接手書並月牋具悉種切稷山荒地至四萬餘畝之多經閣下多方勸諭有主者盡數全開無主者亦可開墾過半其餘荒

地歲事當可無難刁風一經重懲詞訟因之稀少盡心至此佩服良殷俄人之事閣下議論明道有條有理非大局關懷胸有成竹者不能言之弟於前月二十七日奉 命督辦山海關一帶海防事宜同日並奉 密寄大旨謂俄國意在肇覺亟應先事設防以期有備無患津海業有李爵相駐紮惟山海關一帶應添勁旅統以知兵大員故派弟專司其事並飭將晉省毅軍全數帶往鄂皖兩省各選精兵二千名交劉軍門維楨郭軍門寶昌分別統帶均歸節制卽著入都 陛見面授機宜 朝廷厘念海邦固已極臻詳慎惟弟以久病之軀膺重大之任殊覺倍切悚惶現擬酌留毅軍一千人以備晉防仍奏明添募親軍



一千五百人隨營前進業於初三日交卸撫篆二十二日約可起程入都其應如何部署之處必俟回聆 聖訓後方有規模前此與芝岑中丞諸君熟商隨帶各員應於此間派定閣下才識弟所素知凡事皆將借重業已飛札知照務祈交卸後束裝來晉省以便偕行如弟業已起程閣下卽後半月亦可大約都門晤面也

復劉瑞雲

前接三月十三日手書卽於月底遞去一函計登青覽頃又誦悉來示具見關心時事至切至深莫名欽佩歸包一帶空虛洵屬有關大局允宜慎守管鑄鞏固邊防惟以我 朝二百餘年

以來相仍無事匪伊朝夕今西北卽多故矣無如帑藏有左支  
右絀之虞人心有厭動思靜之意思欲有所建置勢恐內中窒  
格而難行前此疆臣未嘗不爲慮及荃到晉後察看形勢撥派  
毅軍亦無非謹持門戶之計就目前而論惟有倚眾志以成城  
其他俱可不必深思吾輩在晉一日則盡一日之心若爲久遠  
之慮於大局誠有裨益其如內外各有門戶何來書又似荃去  
之後公事或稍棘手似又不然人之好善誰不如我公家之事  
凡有地方之責者斷無不樂爲盡力以濟要需卽謂餉項不繼  
晉庫之恆情而時勢無常安知一轉移間不更寬然有餘地耶  
芝岑方伯峻峯廉訪皆留心經營以救時爲念荃之去留尙在

未定仍望照前加意整飭以肅邊政以一眾心是所切囑歸包  
城垣蒙古捻地各節應俟歸綏道笑山觀察稟覆到日再爲斟  
酌辦理蒙兵已退三處甚好委員查勘總須行所無事不可稍  
涉張大致滋議論承示斷不至於滋事尤慰鄙懷後有所聞尙  
冀隨時示悉

復劉瑞雲

頃展月之初十日手函誦聆種切蒙民捻地一事其中交涉太  
多著手不易雖閣下識其性情確有隨機應變之略然非鄙人  
轄境鞭長莫及且閣下駐勇於此治軍乃其專責地方之事應  
歸有司料量此陳平所謂各有主者之說也若尊函所舉軍帥

照會之詞絃外已有餘音似閣下應卽從此而止庶不至冒喧  
賓奪主之誚如必執意而行所慮事終扞格閣下必大受難屈  
時思及鄙言則已難於收拾此實分際時勢迫處於此非謂閣  
下持論之非亦非謂閣下之才不足以了此事尙祈熟處爲幸  
修城之舉捐項若果難籌亦可姑從緩議所派彈壓各員先行  
安靜歸營至以爲慰其中灘雖起波瀾已在潘營官返程之後  
當不至別有議論惟目下是否平復便望函告賤恙經子勉太  
守調治邇日外感悉除再服清補之劑當可日起有功陳情之  
請遠勞眷注如此屆時自應斟酌斷不作無病呻吟或乖出處  
之義劄剛有五月啟行之說倘如閣下所云豈非至願但以旣

定之局欲後來者折捶制之終覺難於就緒耳

### 復奎瀚泉

頃奉惠函並展另示及鈔件均已誦悉錢法爲日用所需矧邊地蒙漢雜處交易事時有若變計稍有弗當咨怨雖僅空言構訟將無了結而民間行使錢文一任市僧之漁利而偏累閭閻久之有弗滋闇者乎查現示所定錢文以五三抵百行使似較原定三十八九抵百者已優至三月望四月朔再各加錢一文是以加至五十五矣若撥兌錢項酌以四釐利息仍以四外行情爲定其抽拔名目永遠禁革似就外面觀之尙無病民之處尊函以爲過於粉飾馴至錢底仍須減落眼前赤子徒喚奈

何是否其偏卽在寶豐社無論取送現錢百串准給該社串子錢五百文蓋平時以五三行使如扣串子五文則僅四十八矣三四兩月雖月各加一文如扣串子五文則僅錢五十矣外有加增之名陰受扣減之累且新舊又無界限將終利於商而偏於民乎來函不甚詳晰總之此事應由地方官道署主政乃朝廷之定例弟在遠不敢遙度攙越於其間更不敢稍涉左右之見統希原諒並望體諒笑山所處之地爲難則此事必可從容了妥也

復江蓉舫

連奉惠函嶺南麥收六七分可稱中稔但糶價過賤人工過貴

貧民易於謀生農民艱於耕作於墾荒事宜不無所礙嶺北節  
候稍遲麥猶未穫如幸無積陰之患收成當有可觀狼鼠之患  
刻無所聞自係捕除有效而州縣因此請領經費亦遂紓至沓  
來仕途難言如此惟有付之一喙而已平糴駟道六州縣差章  
均經丹老一一釐定良工心苦除感佩之外更無他說已批行  
劉守趕緊督飭辦理期於早日竣事永濟考生控件所謂辦賑  
不公者奚指丹老昨寄弟緘並未道及如閣下便函往復似不  
妨多方寬譬毋任老翁日久悒悒也永濟之事刻無官吏主持  
以至百怪交作承示情形自當告知方伯迅飭鄭令赴任以重  
地方至西征餉項除現解而外前已專函請閣下陸續籌解但

資騰飽而實邊儲想蒙心照至矧示豫省鹽務現在東屏方伯  
派員來運擬於南陽地方設局督銷一節雖來函約畧其詞未  
盡吐露底蘊然因聞潞鹽減裁羨費稍有便宜遂欲藉部行興  
利之文爲豫省專利之舉其中不便情形閣下來函所指七端  
眞如漢廷十難駁詰毫無剩義旣佩且慰惟是潞鹽行銷三省  
乃屬閣下專責今甫蒙准減費販商可以通行而他省乃欲從  
中瓜分豆剖藉口試辦攘其利而遺其害實非事理之平縱令  
統將豫省新舊正加各引割歸彼省辦理且免先鹽後課而以  
太阿假人自甘退讓於正名之義何所取則以家計論有田園  
宅舍主人荒廢不治遂令鄰居掃除修葺者乎以商賈論有米



鹽凌雜鋪掌居積不通遂令他人代爲持籌握算者乎若以此  
中有利可圖在晉省當此庫儲竭蹶豈不應籌及可興之利以  
塞司農之望何待外人鰓鰓代計又何肯以大酒肥羊甘飽他  
人之腹乎如謂因晉人鞭長莫及代任馳驅是不足以欺三尺  
之童子而謂晉人甘受其愚便可要約而退有是理乎況乎晉  
省鹽法自改章以後有利則加利盡而減悉與時爲變通未敢  
稍乘國家之利如豫省因目前機有可乘而曰此利自我而開  
足以裨益軍國遂不惜派員經理屆及利盡害生再行拱手奉  
讓謂我本屬試辦原不爭此錙銖天下有如此之偏枯政事乎  
凡此云云皆閣下熟聞飫見所以詳晰相布者蓋欲閣下知弟

主持之隱無所游移如或豫省方伯再有書來以便據理相折耳朗帥雖有來函未及此節倘其議論到此弟當侃侃而談請紓系念賤恙邇日服趙守方劑步履日較健旺瞬屆假滿擬再懇展一月爲調理地步知念附聞

復楊石泉

頃奉月望手函敬聆種切承示南路黑番煽亂比經防軍剿辦均已安妥現在大軍扼塞要害首犯當可就擒想見裘帶從容指揮如意曷勝欽佩侯相整旅出關已足氣吞彼族第進止機宜作何區畫伊城邇日有無動靜均須便函示悉爲幸尊處餉需緊要此間應撥協款本不容日久延欠祇以灾祲之後引課

不行致勞懸盼現在年光雖轉戶口凋殘陳引尙積一綱運庫  
彌形支絀惟念規復伊始待用尤殷舊餉旣尙積懸新餉並須  
籌濟前已諄飭河東道趕緊報解藉供急需昨據詳稱定以月  
杪差委朱巡檢春溪管解銀三萬兩前赴陝局交納弟仍當寓  
函蓉舫觀察倘庫項一有成數卽當源源批解切勿稍涉遲延  
至負遠道呼庚之意賤恙服藥調理已有微效脫可支持決不  
肯再申開缺之請如不能枝梧公事則亦惟有乞退之一法深  
恐貽誤地方負疚更多知念奉告

復盛旭人

溯達緒論星紀已周忽枉尺書如親晤對閣下懷抱利器散髮

林阿旣已出其緒餘福及邦族又復切陳時事策比治安自非  
胸有千秋目無餘子者曷足具此懸解竊意互市各島其同在  
亞細亞州者惟俄羅斯一國而言理言勢紛議莫定者祇和戰  
兩途今閣下謂戰事不可輕言和局不可長恃防務不可稍緩  
是卽宋臣李綱所持能守而後可戰能戰而後可和之論蓋偏  
於理者取快曰前是非而不知孤注一擲立見償車之禍偏於  
勢者熟知成敗利鈍而不知玩愒歲月終無立足之時惟閣下  
斟酌利害熟計始終因勢全和以防爲戰不偏宕亦不激切有  
遠慮且有近功眞可謂善言國是者矣旣經 密寄南北洋大  
臣酌度具奏似悉可見諸施行弗至以空文見意計彈冠之慶

乃旦暮間事薄劣如僕亦何足爲閣下重賤恙刻下猶未復元已於日昨續假一月如幸獲痊自當勉力報効倘難勉支惟有再行乞退一法閣下猶以遠大期之是不知支離其形者分甘長林豐草無復四方之志矣因辱盛問用以附陳

致李玉帥

昨肅寸箋備陳一切弟因督辦海防事宜急應遵 旨入都陛見遂趕於初三日卸篆交芝岑方伯護理擬月杪啟程北上八月初旬計可到京聞俄人蓄謀甚狡 朝廷思患預防自不得不嚴爲之備也茲有懇者屢接湘中耆老來信僉稱南嶽廟前大殿久應興修特工程浩大需費甚鉅至今未及動工茲幸

大公祖福我湘民德化旣行神人允洽建議籌集捐資以備鳩  
庀弟亦當量力捐助仰承德化凡屬湘人聞之莫不欣忭伏思  
南嶽威靈燁赫默相 熙朝正殿爲神所憑依尤應輪奐亟新  
式昭嚴肅現值 禧聖久安率土臣民同深禱祝衡山在五嶽  
中獨稱壽嶽福應尤彰若將殿宇鼎新虔修祀事自必保佑  
聖躬早臻康福以符山阜岡陵之頌十餘年前筱泉制軍敬禮  
南嶽整修一次所以十數年來坐鎮兼圻官民交孚身名俱泰  
至其家簪纓之盛科第之榮方興未艾太夫人起居八座旣壽  
而康慶事萃於一門何莫非神貺所致今大君子建此宏願修  
復大殿重新廟貌足使祝融壯色天柱增輝並以忠愛之忱爲

國祈福異時嶽靈顯應申南降生世澤縣長必有遠勝金張七  
葉者直操券俟之耳弟以無能謬綰軍符綿力雖薄自當趕急  
約集多人湊捐鉅款並擬函致各省知交同結善緣力襄盛舉  
期年之內約計數萬金或可湊齊刻下湘中聞已將次興辦並  
有願捐助者務乞我公查照成案動用公項若干並札飭官紳  
派定董事多人迅卽擇日興工或飭屬一面廣爲籌勸弟處但  
集有成數卽陸續委員呈解匯兌來湘斷不至視爲緩圖爲求  
福星主持於上桑梓官紳相與努力於下共成其事使福地琳  
宮早復舊觀永綏神居從茲華蓋峯頭長誌我公功德於千百  
萬紀矣曷勝懇禱翹盼之至

致彭雪琴

遠隔光儀久疏音敬私衷嚮往莫罄名言弟久任荒陬慚無建  
樹幸今歲年成稍轉民困漸紓差可藉藏鳩拙昨於六月二十  
七日接奉 廷諭督辦山海關一帶海防事宜所有駐晉湘毅  
一軍著全數帶往另由湖北安徽各撥勇二千交劉幹臣郭善  
臣軍門統帶均限八月以前到關聽候調遣宋祝三軍門所部  
各營亦歸節制七月初四日復奉 寄諭現在俄國輪船已駛  
往琿春甯古塔三姓等處並有窺伺松花江之意著會商李爵  
相及岐子惠將軍先調宋部分紮各海口以備不虞初九日又  
奉 寄諭命鮑春霆軍門招募萬人迅速北上翊衛京師以此



情形雖有使臣往議條約而狡謀已露恐非口舌所能轉圜從茲邊釁一開正不知兵連禍結伊於胡底聞總署諸公於和戰兩層猶且一味模稜茫無定見蓋議和則不免受其挾制國勢已日趨於弱主戰則勝負難知更無人敢執其咎以此盈廷相顧噤若寒蟬竟無有獻一奇謀決一良策以分 宵旰之憂者弟愧於中外交涉情形向未諳習今時勢孔迫乃以衰病之軀忝膺軍寄殊不知計何所出現已於月之初三日交卸撫篆將行營事宜畧加部署卽於月杪啟程入都 陛見面領機宜九月到防後再布置一切然所部不過能湊其八千人遼瀋一帶海口甚多究屬不敷扼紮果有戰事更無把握我公老成憂國

於中外大勢早已瞭如指掌必不惜宏謀碩畫啟我愚蒙方今  
事機所在尙乞惠函詳加指示俾弟此行猶有裨於一隅而不  
至鹵莽從事是非獨區區一己之私幸也

致楊石泉

四月杪曾泐覆函河東辦甘常餉五十二萬在同治十年以前  
本係分解甯夏蘭州甯陽庫營等處九年因袁筱翁奏請統歸  
西征糧臺金和園將軍又適有請飭河東每年仍辦十八萬之  
奏經戶部奏准所有河東庚午年辦甘常餉五十二萬分解甯  
夏十八萬西征糧臺三十萬其餘四萬并令暫解西征糧臺由  
左袁自行接濟蘭州以清款目迨至十年俞前道以辛未綱辦

甘常餉五十二萬究應如何勻解詳請部示經戶部議明以十八萬解交金營下餘銀三十四萬均解西征糧臺其蘭州應需餉項仍由左袁斟酌緩急自行接濟等語迭年以來均係照此撥解節經奏咨在案至每綱奉撥鹽課銀五十二萬兩胥以甘肅滿綠兵餉爲言而分解之處一以十年所奏部示爲斷此甘肅常餉改作軍餉之原委也前奉惠函以甘肅兵餉支絀咨道籌撥大批并派委朱牧守提前來弟比以尊處制兵規復餉項艱難旣辱庚癸之呼合竭棉薄之助私情公誼庶幾無嘆當函飭河東道詳查舊案設法籌解茲據覆稱以甘肅兵餉西征軍餉均歸執事主持且甘肅後路之事左相悉以奉諉晉省之餉

解甘解陝原無庸區分畛域况執事境處萬窘據朱委員所陳  
仰屋情形尤令人灼慮無已但檢查上冬撥款部文與節年所  
奉無異並無將軍餉解歸兵餉之語卽閣下來咨亦祇照錄部  
行並無將甘肅常餉仍還甘肅之語今河東鹽課通年祇此入  
數批撥五十二萬且虞力有弗逮將專顧甘肅兵餉而西征與  
金營應解之款既無改解明文無辭貽誤之咎將勻撥數萬金  
勉應尊急而道詳無可措詞弟亦難於敘奏且一經移撥西征  
之餉爲數必至短絀又慮左相或有督責不得已亦擬詳請部  
示再圖報命弟以我公金石之交若以現况之難亟應勉籌巨  
款交來員管解回甘本不必多茲曲折惟兵餉軍餉究有區分

且部中所行照例之文執事並無改撥之請似含糊撥解在敝處既難立言必非執事所願惟一經請示又恐農部轉詢左相必至往返耽延既誤甘肅兵糈且誤西征要款惟有將敝處無憑改撥苦衷函陳清聽由閣下商同左相或將協甘常餉三十萬改解甘省或並金營之十八萬一律全歸兵餉以符舊制俾弟得所持循必當踴躍爲助如驟難定議亦必轉飭河東道將西征軍餉陸續籌解到甘之日由閣下酌量提用庶免兩誤所有詳請部示一節應卽作爲罷論至貴委員遠道提餉辛苦備嘗弟與我公久聯僑札之歡竟無涓滴之効僅令其空手回甘自返此心愧歉無地尙祈俯示含宏優加盼睵是所叩禱

復江蓉舫

昨泐詳函奉覆不日當可達覽頃接月之初九日惠函並鈔示  
咨甘文函及西征糧臺覆件誦聆種種豫鹽口岸彼處既有設  
局督銷之議自未便置而弗論滋人口實今閣下既已派員密  
查一俟得有底蘊再行籌款辦理原未容冒昧著手反致虧折  
也甘肅催餉一節本以詳請部示爲宜因恐別滋轆轤不如以  
理解喻爲妙倘再有辨論請示亦尙不晚俄事自噉使請將崇  
公免罪之後朝議先免崇公罪名仍暫行繫獄以觀後約聞  
已奉有諭旨卻未見諸抵抄劄剛本以五月啟行嗣因總署  
函令候信不卜刻已動身否奉天海口日前已到兵船十餘號

多在日本洋停泊近亦毫無消息夷情詭譎難測幸內閣均已  
籌備戍守不至毫無防範若劫剛到後即可挽回覆局斷非弟  
所敢許但祈不辱壇玷卽屬厚幸賤恙邇日調理微效步履已  
可勉支已於近日疏懇 陛見如蒙 俞允七八月卽當交卸  
北上諸承殷念特詳及之